

**MALAYSIA**  
**DEWAN RAKYAT**  
**ATURAN URUSAN MESYUARAT**

**NASKHAH SAHIH/BAHASA MALAYSIA**

<http://www.parlimen.gov.my>

**HARI RABU, 18 OKTOBER 2023, PUKUL 10.00 PAGI**

**Bil. 56**

---

**PERTANYAAN-PERTANYAAN BAGI JAWAB LISAN**

1. PR-1523-L22205  
**Tuan Yuneswaran A/L Ramaraj [ Segamat ]** minta **MENTERI PERTAHANAN** menyatakan skop pemerkasaan yang sedang dilaksanakan secara menyeluruh terhadap kebajikan dan kelangsungan hidup veteran angkatan tentera sama ada yang berpencen atau tidak berpencen sejajar dengan penilaian semula yang dibuat terhadap golongan tersebut menerusi Skim Perkhidmatan dan Persaraan Negara.
2. PR-1523-L22627  
**Dato' Rosol bin Wahid [ Hulu Terengganu ]** minta **MENTERI PERDAGANGAN DALAM NEGERI DAN KOS SARA HIDUP** menyatakan perkembangan terkini terhadap perancangan mengadakan Kempen Beli Barangan Malaysia secara mega sebagai usaha memperkasa perusahaan mikro, kecil dan sederhana terutama dalam situasi perniagaan berdepan cabaran kemelesetan ekonomi.
3. PR-1523-L22469  
**Tuan Lee Chuan How [ Ipoh Timor ]** minta **MENTERI LUAR NEGERI** menyatakan gambaran keseluruhan keberkesanan Pusat Serantau Asia Tenggara Bagi Mencegah Keganasan (SEARCTT) daripada Januari 2018 sehingga Ogos 2023.
4. PR-1523-L21759  
**Dato' Sri Ikmal Hisham bin Abdul Aziz [ Tanah Merah ]** minta **PERDANA MENTERI** menyatakan sejak awal tahun ini berapa jumlah kerugian dan berapa ramai yang menjadi mangsa *scammer*.

5. PR-1523-L21441  
**Dato' Haji Shamshulkahar bin Mohd Deli [ Jempol ]** minta **MENTERI PEMBANGUNAN KERAJAAN TEMPATAN** menyatakan adakah terdapat cadangan pindaan terhadap Akta Pemajuan Perumahan (Kawalan dan Pelesenan) 1966 [Akta 118] supaya mengelakkan projek perumahan terbengkalai yang sering berlaku dan seterusnya meningkatkan kecekapan pengurusan industri pembinaan perumahan secara keseluruhan.
6. PR-1523-L22493  
**Tuan Hassan bin Saad [ Baling ]** minta **PERDANA MENTERI** menyatakan usaha menaik taraf perkhidmatan Angkatan Pertahanan Awam Malaysia (APM) daripada segi jumlah anggota, logistik serta elaun anggota sukarelawan.
7. PR-1523-L21520  
**Tuan Haji Ahmad Johnie bin Zawawi [ Igan ]** minta **MENTERI KOMUNIKASI DAN DIGITAL** menyatakan sejauh manakah pelaksanaan projek Pelan Jalinan Digital Negara (JENDELA) telah dilaksanakan di Sarawak dan bilakah projek ini akan siap sepenuhnya termasuk di kawasan Parlimen Igan.
8. PR-1523-L22554  
**Dato' Ahmad bin Saad @ Yahaya [ Pokok Sena ]** minta **PERDANA MENTERI** menyatakan peranan JAKIM dalam melakukan usaha sama bersama Kementerian lain khususnya Kementerian Kesihatan dalam membendung aktiviti songsang seperti gay dan lesbian yang semakin membarah dalam masyarakat.
9. PR-1523-L21645  
**Tuan Suhaizan bin Kaiat [ Pulai ]** minta **MENTERI BELIA DAN SUKAN** menyatakan apakah rancangan Kementerian untuk membangunkan belia seluruh negara memandangkan sebahagian mereka mempunyai pandangan berbeza dengan Kerajaan Madani.
10. PR-1523-L21698  
**Dato' Khilir bin Mohd Nor [ Ketereh ]** minta **MENTERI PERTAHANAN** menyatakan sejauh manakah perkembangan industri pertahanan yang telah diwujudkan satu ketika dahulu dan apakah projek-projek yang sedang berjalan di bawah industri pertahanan ini.
11. PR-1523-L21402  
**Tuan Edwin anak Banta [ Selangau ]** minta **PERDANA MENTERI** menyatakan apakah tindakan tatakelola yang diambil untuk memastikan projek yang telah diumumkan dapat dilaksanakan mengikut jadual.

12. PR-1523-L22523

**Tuan Shaharizukirnain bin Abd. Kadir [ Setiu ]** minta **MENTERI LUAR NEGERI** menyatakan pelan tindakan Kementerian bagi mempertahankan kedaulatan maritim negara dalam konflik pertindihan tuntutan Laut China Selatan melalui platform undang-undang antarabangsa.

13. PR-1523-L21923

**Dato' Ramanan Ramakrishnan [ Sungai Buloh ]** minta **MENTERI BELIA DAN SUKAN** menyatakan apakah usaha Kementerian untuk membina Padang Bola Sepak Sintetik dan Gelanggang Sukan Serbaguna di setiap Parlimen.

14. PR-1523-L22357

**Tuan Ahmad Tarmizi bin Sulaiman [ Sik ]** minta **PERDANA MENTERI** menyatakan keberkesanan modul program MyInsaniah yang dilaksanakan oleh JAKIM sebagai usaha bagi memantapkan program penghayatan Islam dalam kalangan remaja dan belia.

15. PR-1523-L22155

**Datuk Larry Soon @ Larry Sng Wei Shien [ Julau ]** minta **MENTERI KOMUNIKASI DAN DIGITAL** menyatakan apakah strategi Kementerian untuk meningkatkan tahap kelajuan capaian jaringan Internet di Sarawak khususnya di kawasan pedalaman luar bandar dan adakah Kementerian berpandangan bahawa perancangan membawa masuk Starlink boleh dianggap satu tindakan yang tuntas untuk tempoh jangka masa panjang kerana dikhuatiri akan menjejaskan menara telekomunikasi sedia ada.

16. PR-1523-L22379

**Tuan Zakri bin Hassan [ Kangar ]** minta **MENTERI BELIA DAN SUKAN** menyatakan penjelasan mengenai usaha-usaha untuk menyediakan kemudahan tinju di beberapa Institut Kemahiran Belia Negara (IKBN) di seluruh negara.

17. PR-1523-L21571

**Puan Vivian Wong Shir Yee [ Sandakan ]** minta **PERDANA MENTERI** menyatakan apakah faktor utama mengapa sebahagian besar daripada belanjawan pembangunan tahunan yang diperuntukkan kepada Sabah tidak dapat dibelanjakan sepenuhnya dan apakah cadangan untuk mengatasi masalah ini.

18. PR-1523-L22003  
**Tuan Muhammad Ismi bin Mat Taib [ Parit ]** minta **MENTERI PEMBANGUNAN KERAJAAN TEMPATAN** menyatakan bilangan projek-projek perumahan mampu milik di seluruh negara yang sedang dirangka oleh Kementerian dalam masa terdekat ini.
19. PR-1523-L21428  
**Tuan Lim Guan Eng [ Bagan ]** minta **MENTERI KOMUNIKASI DAN DIGITAL** menyatakan kemajuan ke atas pembinaan Pusat Ekonomi Digital (PEDi) di setiap kawasan DUN, bilakah ia mula dan siap, kos dan juga sama ada pihak Kementerian akan menubuhkan cawangan di setiap negeri untuk mengendalikan PEDi ini.
20. PR-1523-L21732  
**Kapten Dato' Dr. Zulkaferi bin Hanapi (Bersara) [ Tanjong Karang ]** minta **MENTERI LUAR NEGERI** menyatakan kepada Parlimen tentang persetujuan perjanjian Ambalat antara Malaysia dan Indonesia yang telah diselesaikan serta menerangkan kepada Parlimen apakah bentuk kerjasama antara Kerajaan Indonesia di bawah PERTAMINA dan PETRONAS bagi Malaysia dalam usaha cari gali di Ambalat seperti mana yang disiarkan oleh media Indonesia.
21. PR-1523-L22115  
**Tuan Syahredzan bin Johan [ Bangi ]** minta **PERDANA MENTERI** menyatakan usaha Kementerian untuk meningkatkan perlindungan terhadap mangsa-mangsa hendap berikutan penguatkuasaan undang-undang anti-hendap pada tahun ini serta langkah-langkah rehabilitasi trauma mangsa-mangsa tersebut.
22. PR-1523-L22390  
**Dato' Seri Dr. Shahidan bin Kasim [ Arau ]** minta **MENTERI PERTAHANAN** menyatakan usaha-usaha penambahbaikan dan modenisasi pertahanan yang dilakukan oleh Kementerian sebagai langkah memperkukuhkan kedaulatan negara.
23. PR-1523-L22136  
**Tuan Ganabatirau A/L Veraman [ Klang ]** minta **MENTERI PEMBANGUNAN KERAJAAN TEMPATAN** menyatakan adakah pelan untuk mencontohi Berlin, Jerman untuk mewujudkan satu konsep "*Sponge City*" bagi mengelakkan banjir dan dalam masa yang sama menyelesaikan isu kepanasan global di Klang sebagai projek rintis.

24. PR-1523-L21668

**Tuan Haji Muhammad Islahuddin bin Abas [ Mersing ]** minta **PERDANA MENTERI** menyatakan adakah wujud usaha untuk mengkaji semula keseragaman cuti mingguan, cuti awam, dan cuti khas yang membabitkan sektor awam dan sektor swasta di peringkat Persekutuan dan Negeri-Negeri seluruh negara.

25. PR-1523-L21650

**Datuk Seri Haji Jalaluddin bin Haji Alias [ Jelebu ]** minta **PERDANA MENTERI** menyatakan langkah yang diambil oleh pihak Kerajaan untuk menambahbaik taraf kehidupan Masyarakat FELDA dan apakah pelan jangka masa panjang yang ada untuk FELDA pada masa akan datang.

26. PR-1523-L22568

**Dato' Hajah Siti Zailah binti Mohd Yusoff [ Rantau Panjang ]** minta **PERDANA MENTERI** menyatakan projek dan berapakah peruntukan untuk Negeri Kelantan yang dilaksanakan dalam tahun 2023.

27. PR-1523-L21841

**Tuan Khoo Poay Tiong [ Kota Melaka ]** minta **PERDANA MENTERI** menyatakan adakah Kerajaan bercadang untuk meminda Akta Penyelarasan Pencen 1980 (Akta 238) ekoran keputusan Mahkamah Persekutuan pada 27 Jun yang lalu memutuskan bahawa Seksyen 3 dan 7 Akta Penyelarasan Pencen (Pindaan) 2013 (Akta A1447) adalah tidak sah dan Akta Penyelarasan Pencen 1980 masih terpakai bagi tujuan penyelarasan pencen.

28. PR-1523-L22175

**Tuan Wan Razali bin Wan Nor [ Kuantan ]** minta **PERDANA MENTERI** menyatakan :

- (a) bilangan pelarian etnik Rohingya dan negara-negara lain di Parlimen Kuantan termasuk yang mempunyai dokumen dan tanpa dokumen UNHCR; dan
- (b) tindakan Kerajaan mengawal pergerakan mereka dalam sektor sosial seperti masalah salah laku dan sektor ekonomi seperti penglibatan dalam perniagaan.

29. PR-1523-L21471

**Puan Young Syefura binti Othman [ Bentong ]** minta **MENTERI KOMUNIKASI DAN DIGITAL** menyatakan bilangan orang yang disiasat dan ditangkap, kes yang disenaraikan "*No Further Action*" (NFA), kes yang dituduh di mahkamah, serta kes tertuduh didapati bersalah dan pecahan berdasarkan kewarganegaraan, kaum, jantina, umur dan jenis kesalahan di bawah Seksyen 233 Akta Komunikasi dan Multimedia bagi tahun 2023.

30. PR-1523-L22497

**Tuan Hassan bin Saad [ Baling ]** minta **PERDANA MENTERI** menyatakan usaha Kerajaan dalam menaikkan elaun guru KAFA kepada RM1500 dan nyatakan pelan tindakan Kerajaan untuk menambah bilangan guru-guru KAFA dalam mendidik anak bangsa.

31. PR-1523-L21135

**Dato' Mohd Isam bin Mohd Isa [ Tampin ]** minta **PERDANA MENTERI** menyatakan secara terperinci istilah mangsa banjir yang dimaksudkan Kerajaan bagi membolehkan seseorang itu layak untuk mendapatkan bantuan dan adakah Kerajaan bercadang untuk mengeluarkan *handout* sebagai rujukan bagi mengelakkan sebarang kekeliruan.

32. PR-1523-L22417

**Dato' Sri Dr. Haji Ismail bin Haji Abd. Muttalib [ Maran ]** minta **MENTERI PERDAGANGAN DALAM NEGERI DAN KOS SARA HIDUP** menyatakan bagaimanakah Kerajaan mengawal kenaikan harga barang-barang yang dilihat semakin hari semakin meningkat, yang mana ianya amatlah membebankan rakyat diketika ini dan apakah faktor yang menyebabkan kenaikan harga barang ini.

33. PR-1523-L22053

**Datuk Seri Dr. Haji Dzulkefly bin Ahmad [ Kuala Selangor ]** minta **PERDANA MENTERI** menyatakan kesediaan memperuntukkan dana pembiayaan kepada parti-parti politik, dengan syarat-syarat tertentu, bagi meningkatkan tatakelola yang baik dan benteras amalan '*kick-back*' yang hampir sebatik sekarang ini dalam Akta Pendanaan Politik yang bakal dibentang.

34. PR-1523-L21736

**Kapten Dato' Dr. Zulkaferi bin Hanapi (Bersara) [ Tanjong Karang ]** minta **PERDANA MENTERI** menyatakan pendirian Kerajaan mengenai isu had umur persaraan pegawai perkhidmatan awam berikutan beberapa usul yang dibuat oleh beberapa pihak yang mahukan had umur tersebut dinaikkan daripada 60 tahun kepada 65 tahun. Adakahkah langkah ini akan membebaskan lagi tanggungan Kerajaan dan membantutkan hasrat Kerajaan Madani dalam usaha mengecilkan kakitangan perkhidmatan awam.

35. PR-1523-L21303

**Dato' Sri Doris Sophia anak Brodi [ Sri Aman ]** minta **MENTERI PERDAGANGAN DALAM NEGERI DAN KOS SARA HIDUP** menyatakan apakah inisiatif atau skim terkini bagi tahun 2023 yang disediakan oleh Suruhanjaya Syarikat Malaysia (SSM) untuk membantu peniaga dan usahawan tempatan bagi memulihkan ekonomi negara.

36. PR-1523-L22448

**Tuan Haji Bakri bin Jamaluddin [ Tangga Batu ]** minta **MENTERI PERTAHANAN** menyatakan penjelasan tentang status terkini kerja projek membaik pulih bekalan air di Kem Terendak dan bilakah projek ini dapat disiapkan sepenuhnya.

37. PR-1523-L21364

**Dato Henry Sum Agong [ Lawas ]** minta **MENTERI KOMUNIKASI DAN DIGITAL** menyatakan bila agaknya liputan telekomunikasi yang menyeluruh dapat tercapai di kawasan daerah Lawas, berapa buah menara telekomunikasi yang didirikan dan beroperasi sepenuhnya setakat ini.

38. PR-1523-L22557

**Datuk Haji Ahmad Marzuk bin Shaary [ Pengkalan Chepa ]** minta **PERDANA MENTERI** menyatakan :

- (a) status terkini Lembaga Tabung Haji (LTH) yang masih mengalami kesukaran untuk menyelesaikan isu pelaburan RM600 juta sukuk di dalam Menara ABS Bhd (MABS) dan pelaburan hartanah di luar negara seperti di Arab Saudi; dan
- (b) usaha-usaha yang sedang dijalankan oleh LTH bagi mengatasi perkara ini dan adakah pelaburan-pelaburan ini akan memberikan kesan negatif kepada keuntungan keseluruhan LTH seterusnya pembayaran dividen untuk tahun kewangan 2023.

39. PR-1523-L21162  
**Tuan Tan Kok Wai [ Cheras ]** minta **MENTERI PEMBANGUNAN KERAJAAN TEMPATAN** menyatakan status rundingan di antara Kerajaan Persekutuan dan Kerajaan Negeri Selangor mengenai penglibatan negeri Selangor dalam Akta 672.
40. PR-1523-L21453  
**Tuan Mohamad Shafizan Haji Kepli [ Batang Lupar ]** minta **PERDANA MENTERI** menyatakan apakah terdapat usaha bagi menubuhkan bangunan pejabat khusus untuk badan-badan seperti Angkatan Pertahanan Awam Malaysia (APM) dan Jabatan Sukarelawan Malaysia (RELA) di peringkat daerah bagi memudahkan tugas dan kerja-kerja operasi mereka.
41. PR-1523-L21709  
**Tan Sri Dato' Haji Mahiaddin bin Haji Mohd. Yassin [ Pagoh ]** minta **MENTERI KOMUNIKASI DAN DIGITAL** menyatakan sejauh manakah komitmen Kerajaan dalam mempertahankan kebebasan bersuara dan kebebasan media, mengambil kira pelbagai sekatan yang berlaku yang disifatkan sebagai bercanggah dengan janji-janji reformasi Pakatan Harapan sebelum ini.
42. PR-1523-L21501  
**Puan Wong Shu Qi [ Kluang ]** minta **MENTERI PEMBANGUNAN KERAJAAN TEMPATAN** menyatakan sama ada Pihak Berkuasa Tempatan mempunyai kuasa memberi kelonggaran seperti pengecualian CCC terhadap asrama pekerja yang terletak di kawasan ladang atau luar kawasan pentadbiran PBT.
43. PR-1523-L22270  
**Dr. Siti Mastura binti Muhammad [ Kepala Batas ]** minta **MENTERI PERDAGANGAN DALAM NEGERI DAN KOS SARA HIDUP** menyatakan :  
(a) adakah inisiatif Jualan Rahmah membantu rakyat dan perincian keberkesananannya; dan  
(b) adakah pihak Kerajaan bercadang membuat kekerapan Jualan Rahmah sebulan sekali di setiap DUN dan Parlimen di Pulau Pinang.
44. PR-1523-L21293  
**Dato' Sri Doris Sophia anak Brodi [ Sri Aman ]** minta **MENTERI KOMUNIKASI DAN DIGITAL** menyatakan apakah status terkini pembinaan menara telekomunikasi yang dapat membekalkan perkhidmatan dengan baik kepada rakyat di Sri Aman.

45. PR-1523-L22337

**Tuan Abdul Latiff bin Abdul Rahman [ Kuala Krai ]** minta **PERDANA MENTERI** menyatakan adakah pihak Kerajaan bercadang menyemak semula kadar potongan sewa kuarters berdasarkan gred gaji yang diamalkan sekarang kepada kadar semasa atau lokaliti serta jenis kuarters yang lama atau baharu, kayu atau batu dan mempunyai kelengkapan yang mencukupi dan tidak mencukupi.

46. PR-1523-L22354

**Tuan Abdul Latiff bin Abdul Rahman [ Kuala Krai ]** minta **PERDANA MENTERI** menyatakan :

- (a) apa sikap dan pandangan Kerajaan terhadap isu petisyen yang difailkan oleh Nik Elin Zurina Nik Abdul Rashid dan Tengku Yasmin Nastasha Tengku Abdul Rahman terhadap Kerajaan Negeri Kelantan yang mencabar Enakmen Kanun Jenayah Syariah (I) Kelantan 2019 dalam usaha mengisytiharkan 20 peruntukan kesalahan dalam enakmen itu terbatal dan tidak sah; dan
- (b) sejauh mana tindakan proaktif Kerajaan Persekutuan bagi mengawal tindakan rakyat mencabar kuasa Badan Undangan Negeri daripada berulang pada masa hadapan.

47. PR-1523-L21853

**Tuan Khoo Poay Tiong [ Kota Melaka ]** minta **PERDANA MENTERI** menyatakan adakah Kerajaan bercadang untuk menggubal rang undang-undang baharu untuk mengawal ahli-ahli politik daripada menyalahgunakan isu agama dan kaum dalam perjuangan politik mereka.

48. PR-1523-L22436

**Dr. Abd Ghani bin Ahmad [ Jerlun ]** minta **PERDANA MENTERI** menyatakan pendirian Kerajaan Persekutuan dan langkah drastik yang telah diambil dalam kes Nik Elin Zurina binti Nik Abdul Rashid dan anaknya, Tengku Yasmin Nastasha binti Tengku Abdul Rahman terhadap Kerajaan Negeri Kelantan yang mencabar kuasa Badan Perundangan Negeri untuk menggubal Undang-undang Jenayah Syariah di bawah Senarai Negeri, Jadual Kesembilan, Perlembagaan Persekutuan.

49. PR-1523-L21881

**Tuan Azli bin Yusof [ Shah Alam ]** minta **MENTERI PERTAHANAN** menyatakan adakah Kerajaan bercadang melaksanakan satu mekanisme untuk mempromosi ATM di semua Institusi Pengajian Tinggi untuk menarik minat kaum bukan Melayu untuk menyertai ATM memandangkan penyertaan bukan Bumiputera masih berada pada tahap 3%.

50. PR-1523-L22241

**Tan Sri Haji Abdul Hadi bin Awang [ Marang ]** minta **MENTERI PERDAGANGAN DALAM NEGERI DAN KOS SARA HIDUP** menyatakan apakah pelan komprehensif bagi jangka pendek dan jangka panjang Kementerian dalam memerangi kartel yang berkuasa besar dalam menentukan harga barangan keperluan asas rakyat.

51. PR-1523-L22288

**Tuan Gobind Singh Deo [ Damansara ]** minta **PERDANA MENTERI** menyatakan adakah Akta Pemansuhan Hukuman Mati Mandatori 2023 dan Akta Semakan Hukuman Mati dan Pemenjaraan Sepanjang Hayat (Bidang Kuasa Sementara Mahkamah Persekutuan) 2023 terpakai kepada pesalah kanak-kanak yang telah dijatuhkan hukuman di bawah S97(2) Akta Kanak-Kanak 2001 dan, sekiranya tidak terpakai, apakah langkah-langkah dan cadangan yang diambil untuk menyelaraskan perkara ini.

52. PR-1523-L21577

**Puan Vivian Wong Shir Yee [ Sandakan ]** minta **MENTERI PEMBANGUNAN KERAJAAN TEMPATAN** menyatakan sama ada Kementerian akan mempertimbangkan untuk penarafan kedudukan semua Pihak Berkuasa Tempatan (PBT) di negara ini untuk memantau prestasi dan kualiti perkhidmatan mereka yang disampaikan kepada orang ramai.

53. PR-1523-L21505

**Tuan Lee Chean Chung [ Petaling Jaya ]** minta **MENTERI PEMBANGUNAN KERAJAAN TEMPATAN** menyatakan pendirian Kementerian bagi melaksanakan jaminan korporat terhadap projek pemajuan perumahan bagi mengukuhkan kebertanggungjawaban pemaju terhadap projeknya.

54. PR-1523-L21473

**Puan Young Syefura binti Othman [ Bentong ]** minta **PERDANA MENTERI** menyatakan bilangan statistik berkaitan dengan kesalahan jenayah di kalangan kanak-kanak dan jenis kesalahan yang dilakukan serta bilangan kes yang telah dijatuhkan hukuman juvena untuk tahun 2023.

55. PR-1523-L21195

**Datuk Wetrom bin Bahanda [ Kota Marudu ]** minta **PERDANA MENTERI** menyatakan adakah terdapat perancangan Agensi Pengurusan Bencana Negara (NADMA) membina satu pusat pemindahan sementara yang lebih luas di Kota Marudu bagi menempatkan mangsa-mangsa yang terlibat dalam situasi bencana seperti banjir yang berlaku hampir saban tahun.

56. PR-1523-L22098

**Dato' Seri Hamzah bin Zainudin [ Larut ]** minta **PERDANA MENTERI** menyatakan bagaimana sasaran Indeks Persepsi Rasuah di tangga 25 teratas dunia yang terkandung dalam ekonomi Madani boleh dicapai setelah adanya keputusan DNAA baru-baru ini.

**ATURAN URUSAN MESYUARAT DAN USUL-USUL**

1. ( D.R. 31/2023 ) Rang Undang-undang Perbekalan 2024 - **Menyambung semula perbahasan atas masalah, "Bahawa Rang Undang-Undang ini dibacakan kali yang kedua sekarang," (17 Oktober 2023 )**

**DAN**

**Usul dibuat oleh YAB Menteri Kewangan dan masalah dicadangkan :-**

“Bahawa Dewan ini, mengikut subseksyen 4(3) Akta Kumpulan Wang Pembangunan 1966 [Akta 406], membuat ketetapan iaitu suatu jumlah wang sebanyak tidak lebih dari sembilan puluh dua bilion ringgit (RM92,000,000,000) dibelanjakan daripada Kumpulan Wang Pembangunan bagi tahun 2024, dan bagi tujuan dan butiran Perbelanjaan Pembangunan yang dinyatakan di bawah Maksud Pembangunan atau (“P”) dalam senarai Anggaran Perbelanjaan Persekutuan 2024, yang dibentangkan sebagai Kertas Perintah 34 Tahun 2023, adalah diuntukkan di bawah Maksud-maksud yang berkenaan jumlah-jumlah yang bersestentangan dengan butiran-butiran itu di ruangan enam dan tujuh senarai tersebut.”

**Menyambung semula perbahasan atas masalah ( 17 Oktober 2023 )**

2. ( D.R. 33/2023 ) Rang Undang-Undang Syarikat (Pindaan) 2023 - **Menyambung semula perbahasan atas masalah, "Bahawa Rang Undang-undang ini dibacakan kali yang kedua sekarang," ( 12 Oktober 2023 )**

**[ Menteri Perdagangan Dalam Negeri dan Kos Sara Hidup ]**

3. ( D.R. 25/2023 ) Rang Undang-Undang Kawalan Produk Merokok Demi Kesihatan Awam 2023 – **Bacaan Kali Yang Kedua**

Dan;

Pengerusi Jawatankuasa Pilihan Khas Kesihatan oleh Yang Berhormat Datuk Seri Dr. Dzulkefly bin Ahmad, Ahli Parlimen Kuala Selangor akan mencadangkan :

“**BAHAWA** Penyata yang disiapkan oleh Jawatankuasa Pilihan Khas Kesihatan untuk mengkaji Rang Undang-Undang Kawalan Produk Merokok Demi Kesihatan Awam 2023, yang dibentangkan dalam Majlis ini sebagai Kertas DR. 8 Tahun 2023 diperkenankan mengikut Peraturan Mesyuarat 60”.

4. ( D.R. 26/2023 ) Rang Undang-Undang Makanan (Pindaan) 2023. **Bacaan Kali Yang Kedua**  
**[ Menteri Kesihatan ]**

5. PR-1523-U(27)278  
**Datuk Seri Ir. Dr. Wee Ka Siong [ Ayer Hitam ]** akan mencadangkan :

"Bahawa Dewan Rakyat ini menggesa Kerajaan untuk segera menangani isu gangguan bekalan beras putih tempatan (BPT) di pasaran yang kian meruncing susulan tindakan India menghentikan eksport beras putihnya ke pasaran.

Langkah penetapan had pembelian maksimum 100kg BPT untuk setiap individu dan syarikat bermula 7 September 2023 hanyalah penyelesaian yang bersifat sementara dan Kerajaan seharusnya mula merangka satu pelan yang lebih tuntas dalam usaha menjamin keterjaminan bekalan beras di Malaysia bagi jangka masa yang panjang.

Kerajaan perlu segera mewujudkan rangka tindakan yang lebih komprehensif bagi mengurangkan impak inflasi makanan global dari terus menghimpit rakyat negara ini khususnya berkaitan beras yang menjadi makanan ruji kita semua."

**[ Menteri Pertanian dan Keterjaminan Makanan ]**

6. PR-1523-U(27)279  
**Datuk Seri Ir. Dr. Wee Ka Siong [ Ayer Hitam ]** akan mencadangkan :

"Bahawa Dewan Rakyat ini menggesa Kerajaan mencari penyelesaian untuk mengurangkan kos pengambilan pekerja asing yang kian melambung tinggi. Kebergantungan majikan tempatan terhadap pekerja asing berbanding pekerja tempatan di negara ini bukanlah perkara asing terutama dalam sektor 3D (*dirty, dangerous and difficult*).

Maka, adalah penting untuk mewujudkan satu dasar yang lebih komprehensif bagi mengurangkan kebergantungan terhadap pekerja asing agar pekerja tempatan diberi keutamaan terlebih dahulu dengan reformasi terhadap ekosistem sektor 3D meliputi kadar gaji, faedah dan sebagainya yang berpadanan dengan risiko pekerjaan perlu diimplementasikan secara berseiringan."

**[ Menteri Dalam Negeri ]**

## 7. PR-1523-U(27)280

**Datuk Seri Ir. Dr. Wee Ka Siong [ Ayer Hitam ]** akan mencadangkan :

"Bahawa Dewan Rakyat ini menggesa Kerajaan untuk mewujudkan satu dasar mengutamakan sajian menu buah-buahan tempatan di semua majlis rasmi Kerajaan sebagai galakan dan sokongan kepada pemain industri buah-buahan tempatan serta ke arah membudayakan amalan pemakanan sihat.

Adalah menjadi tanggungjawab Kementerian bagi membantu pengusaha buah-buahan tempatan untuk memasarkan serta mempromosi hasil ladang mereka dan sekali gus meningkatkan pendapatan. Maka melalui sajian menu buah-buahan di kesemua majlis rasmi Kerajaan perlu dibudayakan sepenuhnya sebagai sokongan terhadap industri buah-buahan tempatan.

**[ Menteri Pertanian dan Keterjaminan Makanan ]**

## 8. PR-1523-U(27)281

**Dato' Indera Mohd Shahar bin Abdullah [ Paya Besar ]** akan mencadangkan :

"Bahawa Dewan Rakyat menggesa Kerajaan untuk membentangkan perancangan jangka masa panjang yang menyeluruh dalam memastikan Jumlah Kadar Kesuburan (Total Fertility Rate) bagi rakyat Malaysia terus meningkat.

Negara kita telah beralih ke status negara menua pada tahun 2021. Hal ini kerana peratusan penduduk berusia 65 tahun dan ke atas telah mencapai 7% daripada jumlah populasi. Trend ini menunjukkan peningkatan dalam dua tahun lalu pada kadar 0.2 peratus setahun di mana pada tahun 2022 sebanyak 7.2% dan dijangka pada tahun 2023 mencapai 7.4%.

Dalam tempoh dua dekad lagi, negara dijangka beralih kepada negara tua apabila kohort umur yang sama mencapai 14% daripada jumlah populasi. Peralihan ini tentunya memberikan kesan yang paling ketara iaitu kepada penurunan trend populasi pekerja dan produktiviti. Bagi menghadapi cabaran dan dampak negara menua, kita perlu mencari jalan memperlahankan proses penuaan ini. Proses penuaan ini tidak boleh dihalang atau diberhentikan tetapi kita perlu mempunyai pelan persediaan bagi menghadapi situasi tersebut.

Jika kita teliti jumlah peratusan struktur umur penduduk yang berumur 0-14 tahun berlaku penurunan pada kadar 0.4% bagi 3 tahun iaitu ; tahun 2020 sebanyak 24%, 2021 sebanyak 23.6%, 2022 sebanyak 23.2%, dan 2023 sebanyak 22.6%.

Umum mengetahui negara-negara jiran dan serantau juga menghadapi perkara penurunan bagi jumlah kadar kesuburan, tetapi kadar tersebut agak perlahan penurunannya. Sehubungan itu, objektif kita agar dapat melandaikan graf penurunan ini bagi negara kita.

Persoalan saya, apakah kemampuan hospital Kerajaan dalam meningkatkan kemampuan kesihatan reproduktif. Berapa jumlah Hospital yang menyediakan perkhidmatan IUI dan IVF. Berapa ramai doktor pakar reproduktif masih berkhidmat di hospital Kerajaan. Adakah harga perkhidmatan yang dikenakan mampu diakses oleh rakyat. Berapa jumlah makmal reproduktif.

Dewan Rakyat juga perlu mencadangkan agar Kerajaan menetapkan polisi yang mampan seperti fleksibel waktu bekerja, yuran pusat penjagaan kanak yang mampu bayar, perbanyakkan pusat asuhan ditempat kerja, dan *paternity leave* kepada ibu bapa yang bekerja untuk meringankan bebanan mereka dalam meningkatkan kadar reproduktif rakyat Malaysia. *Population Complexity* ini yang harus kita uruskan dengan penuh keberanian dan semua pihak kena bersama-sama."

**[ Menteri Pembangunan Wanita, Keluarga dan Masyarakat ]**

9. PR-1523-U(27)283

**Dato' Indera Mohd Shahar bin Abdullah [ Paya Besar ]** akan mencadangkan :

"Bahawa Dewan Rakyat menggesa Kerajaan untuk membentangkan sebuah Kertas Putih Imigresen yang membincangkan tentang kadar atau jumlah sebenar kemasukan pelawat asing ke negara Malaysia.

Perkara ini bertujuan untuk mengetahui pergerakan pelawat asing berkenaan sama ada mereka terus tinggal di Malaysia atau dalam satu tempoh tertentu. Menerusi ini kita akan mengetahui jumlah sebenar populasi rakyat di negara ini melalui pengenalpastian perbezaan antara jumlah Warganegara Malaysia, Jumlah Pelawat Asing yang masuk ke negara kita sebagai pekerja ataupun dengan tujuan melancong.

Hal ini, akan memudahkan Kerajaan untuk merangka dan melaksanakan pelbagai pelan inisiatif mahupun bantuan seperti subsidi bersasar dan lain-lain agar setiap pelaksanaan tersebut dinikmati oleh rakyat di negara kita."

**[ Menteri Dalam Negeri ]**

## 10. PR-1523-U(27)286

**Datuk Seri Panglima Madius Tangau [ Tuaran ]** akan mencadangkan :

"Bahawa Dewan ini menerima hakikat bahawa lebih 100,000 calon peperiksaan SPM pada tahun 2022 telah gagal dalam mata pelajaran dan sekaligus gagal mendapat Sijil Pelajaran Malaysia (SPM).

Menerima hakikat juga bahawa kegagalan dalam peperiksaan SPM ini mengakibatkan masa depan yang gelap kepada calon pada purata 70 ribu hingga 100 ribu setahun.

Menerima hakikat bahawa pelajar tercicir ini tidak ada lagi ruang untuk melanjutkan pelajaran maka segolongan pelajar tercicir ini akan menjadi kerugian dalam sumber tenaga kerja negara.

Dan menerima hakikat bahawa matlamat mendidik sebuah generasi pelajar untuk membina dan membangun negara kita telah gagal maka Kerajaan hendaklah mengambil tindakan yang serius terhadap masalah ini.

Maka dengan itu Dewan Yang Mulia ini hendaklah membuat ketetapan agar silibus dan buku-buku teks Subjek Sejarah Tingkatan Satu, Dua, Tiga, Empat dan Tingkatan Lima hendaklah dikaji semula dan sebuah Jawatankuasa Pilihan Khas Parlimen hendaklah ditubuhkan untuk mendapat pandangan daripada setiap lapisan masyarakat daripada seluruh pelusuk negara, dan pada masa yang sama Jemaah Kabinet hendaklah menubuhkan sebuah Jawatankuasa Kabinet Kajian Semula Silibus dan Buku Teks Sejarah yang dianggotai oleh Menteri-Menteri yang mewakili Sabah, Sarawak, Persekutuan Tanah Melayu dan parti-parti politik yang menubuhkan Kerajaan Perpaduan."

**[ Menteri Pendidikan ]**

## 11. PR-1523-U(27)287

**Datuk Seri Panglima Madius Tangau [ Tuaran ]** akan mencadangkan :

"Bahawa Dewan ini Menerima hakikat bahawa sebuah Suruhanjaya Siasatan DiRaja yang ditubuhkan oleh Kerajaan suatu ketika dahulu telah berjaya membuat siasatan dan seterusnya telah dibentangkan di Dewan Yang Mulia ini.

Dan menerima hakikat bahawa setelah sekian lama laporan tersebut telah gagal dilaksanakan dan mengakibatkan ketidakpuasan hati sebahagian besar daripada rakyat Malaysia.

Menerima hakikat juga bahawa rakyat tertanya-tanya apakah yang telah terjadi dengan laporan Suruhanjaya Siasatan DiRaja tersebut.

Dan menerima hakikat bahawa kecelaruan urus tadbir Pendatang Tanpa Izin; Penduduk Asing di Sabah yang mempunyai Kad Pengenalan yang meragukan; Peningkatan Bilangan penduduk di Sabah Tanpa Kewarganegaraan ataupun *stateless children* dan kehadiran orang asing yang memegang dokumen IMM13 yang tidak ada halatuju.

Maka Dewan Yang Mulia ini hendaklah membuat ketetapan bahawa sebuah Jawatankuasa Pilihan Khas Parlimen untuk meneliti dan mengkaji semula rekomendasi dan perakuan Laporan Suruhanjaya Siasatan DiRaja Mengenai Pendatang Asing Tanpa Izin untuk merumuskan suatu Road Map penyelesaian tuntas terhadap masalah oleh empat kategori penduduk golongan pendatang asing di Sabah."

**[ Menteri Dalam Negeri ]**

12. PR-1523-U(27)290

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa supaya Kerajaan meletakkan sebuah garis panduan untuk sekolah-sekolah bagi pengurusan dana, perbelanjaan, dan juga aktiviti kutipan wang daripada pelajar, ibu-bapa, dan orang ramai. Selain itu, sebuah badan pemantau perlu diwujudkan bagi memastikan garis panduan ini dipatuhi. Ini kerana, kini sudah menjadi sebuah kelaziman untuk pihak-pihak sekolah menganjurkan program-program dan majlis-majlis yang memakan belanja besar, yang menggunakan duit daripada poket pelajar. Sebahagian daripada majlis ini mewajibkan kehadiran, dan sebahagian lainnya adalah secara sukarela. Tetapi harus kita faham, kewujudan jurang ekonomi akan membuatkan wujudnya golongan pelajar yang rasa keciciran sosial disebabkan faktor kewangan keluarga. Ia juga membuat mereka berasa tertekan serta memberi tekanan kepada ibu-bapa, lebih-lebih lagi dalam situasi ekonomi kini. Bukan sahaja untuk majlis, malah sering juga pihak sekolah membuat kutipan wajib bagi pembaharuan infrastruktur, dan kutipan ini kadangkala boleh mencecah ratusan ringgit. Isu ini merupakan sebuah isu yang kurang mendapat perhatian tetapi penting untuk dibawa ke hadapan kerana ia melibatkan sosioekonomi keluarga B40 dan M40 serta kesejahteraan perkembangan minda dan emosi para pelajar yang bakal menjadi teraju negara ini di masa hadapan. Selain itu, dibimbangi jika tiada pemantauan dilakukan, perkara ini akan membuka ruang untuk pihak tertentu mengambil kesempatan."

**[ Menteri Pendidikan ]**

## 13. PR-1523-U(27)291

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa supaya Kerajaan mengambil langkah pro-aktif dalam menangani serta menghentikan kes jenayah dera kanak-kanak di negara ini. Menteri Dalam Negeri pada 14 Mac 2023 melaporkan bahawa terdapat 220 kes kanak-kanak mati akibat penderaan antara tahun 2018 hingga 2022. Data Kementerian Pembangunan Wanita, Keluarga dan Masyarakat antara Januari hingga Jun 2022 juga mendedahkan terdapat 1,055 kes penderaan kanak-kanak di negara ini. Kanak-kanak adalah masa depan negara. Lantaran itu, pihak kerajaan wajar menangani lantas menghentikan kitaran dera ini dengan sebuah target 'Dera Sifar' menerusi langkah-langkah pro-aktif seperti mewajibkan kursus penjagaan anak, mewujudkan sistem pemantauan berkala, meneliti semula undang-undang serta garis panduan berkenaan penjagaan kanak-kanak, meningkatkan kesedaran masyarakat, dan lain-lain."

**[ Menteri Dalam Negeri ]**

## 14. PR-1523-U(27)292

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat menggesa Kerajaan mengambil tindakan yang lebih pro-aktif dan efisien bagi meningkatkan kesedaran, tindak balas, dan kerjasama masyarakat dalam menghadapi bencana alam. Kerajaan telah mengumumkan penubuhan Pusat Bencana Geologi Negara pada akhir tahun ini serta pembangunan Sistem Amaran Awal Tanah Runtuh (SAATR). Inisiatif ini akan dapat meningkatkan kecekapan tindak balas bencana agensi-agensi berkaitan. Bagaimana pula dengan tindak balas masyarakat."

Apa yang telah dan sedang Kerajaan usahakan bagi memastikan rakyat bukan sahaja peka tetapi takut dan patuh kepada arahan yang dikeluarkan oleh pihak berkuasa. Kerajaan perlu menguatkuasakan Akta Pertahanan Awam 1951, Akta 221 bawah seksyen 4 (C) di mana tindakan boleh diambil ke atas mereka yang tidak patuh kepada arahan pihak berkuasa contohnya arahan untuk berpindah dalam situasi banjir yang boleh membahayakan penduduk dan pada masa yang sama memberi risiko kepada penyelamat."

**[ Perdana Menteri ]**

## 15. PR-1523-U(27)293

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa supaya Kerajaan menubuhkan badan siasatan bebas bagi mengenal pasti secara terperinci punca utama yang menyebabkan kekurangan bekalan makanan seperti beras tempatan, ayam dan telur ayam di pasaran serta merangka perancangan penyelesaian jangka pendek dan panjang yang komprehensif termasuk penguatkuasaan terhadap golongan kartel orang tengah serta menambahkan daya pengeluaran bekalan makanan. Rakyat baik dari kalangan pengguna mahupun pengusaha restoran kecil masih mengeluh dengan permasalahan ini yang menyebabkan kenaikan harga bekalan makanan. Kerajaan tidak seharusnya melepaskan tanggungjawab menjaga keterjaminan bekalan makanan kepada individu (sebagai *end user*) mahupun menyarankan penyelesaian jalan mudah seperti menambah import makanan tetapi mencari penyelesaian sepanjang rangkaian jaringan bekalan bahan makanan mentah."

**[ Menteri Pertanian dan Keterjaminan Makanan ]**

## 16. PR-1523-U(27)294

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa Kerajaan supaya mewujudkan pusat benih padi khusus di kawasan utara khususnya di Arau, Perlis bagi membekalkan benih-benih padi yang bermutu tinggi dan membolehkan penyelidikan yang agresif dibuat bagi menghasilkan benih padi baru di samping menyelesaikan masalah ketidakcukupan benih padi di pasaran. Pusat Benih Padi adalah penting untuk mengumpul benih padi yang lebih berdaya komersial, lebih berdaya tahan iklim (*climate resistant*) dan sesuai dengan cuaca di kawasan utara Semenanjung Malaysia. Pusat ini juga boleh berperanan menjalankan kajian di peringkat serantau dan melibatkan penyelidik daripada negara-negara jiran seperti Thailand, Indonesia dan Myanmar yang mempunyai tanaman baka padi yang berdaya komersial tinggi."

**[ Menteri Pertanian dan Keterjaminan Makanan ]**

## 17. PR-1523-U(27)295

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa Kerajaan supaya mengkaji semula peruntukan khas yang boleh diberikan kepada pekebun kecil, penternak dan nelayan yang terjejas akibat situasi iklim yang tidak menentu serta kenaikan harga barang. Kerosakan tanaman dan kematian ternakan seringkali mendatangkan kerugian besar hingga kepada jutaan ringgit setiap kali berlaku bencana alam. Dengan situasi semasa ekonomi negara yang tidak stabil juga secara tidak langsung akan memberi tekanan kepada kos sara hidup pekebun kecil, penternak dan nelayan yang kebanyakannya bergantung harap kepada sumber pendapatan tersebut sahaja. Maka pemberian peruntukan khas ini dapat menambah baik kehidupan mereka."

**[ Menteri Pertanian dan Keterjaminan Makanan ]**

## 18. PR-1523-U(27)296

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa Kerajaan supaya menyegerakan pembinaan dan baik pulih tembok sempadan Malaysia-Thailand supaya merangkumi keseluruhan perbatasan dari Perlis hingga Kelantan dan menyediakan suatu pelan tindakan komprehensif merangkumi semua agensi Kerajaan bagi kawalan sempadan Malaysia-Thailand. Sempadan Malaysia-Thailand adalah sepanjang kira-kira 656km namun hanya 111 km sahaja yang berpagar. Sebahagian tembok sempadan antara Malaysia dan Thailand di sepanjang Laluan Keselamatan dan Pembangunan (KESBAN) dilihat sudah usang manakala peralatan kamera litar tertutup (CCTV) dan alat pengimbas perlu ditambah, dibaik pulih dan dinaik taraf dengan teknologi terkini seperti penggunaan dron. Beberapa insiden pada masa lalu seperti kes tembakan ke atas pasukan keselamatan negara dan bermaharajalelanya sindiket pemerdagangan manusia seperti yang berlaku di insiden Wang Kelian serta penyeludupan barangan termasuk dadah dan senjata menunjukkan betapa kritikalnya keperluan untuk meningkatkan tahap keselamatan di perbatasan. Kerajaan Malaysia sebelum ini telah memberikan komitmen untuk membina tembok sempadan tersebut tetapi sehingga terkini masih tiada pelan pembangunan komprehensif dan terperinci yang diumumkan. Mohon pihak kerajaan memandang serius perkara ini dengan menyegerakan pembangunan tembok sempadan Malaysia-Thailand secara menyeluruh dan memastikan suatu pelan komprehensif merangkumi semua agensi Kerajaan bagi kawalan sempadan Malaysia-Thailand agar benar-benar berkesan menjamin keselamatan perbatasan negara."

**[ Perdana Menteri ]**

## 19. PR-1523-U(27)297

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa Kerajaan supaya agihan peruntukan pembangunan dan pelaksanaan projek pembangunan di peringkat negeri diberikan mengikut keutamaan dan keperluan Kerajaan Negeri. Berdasarkan pelan RMK-12, enam negeri kurang membangun akan terus diberi keutamaan dengan agihan sekurang-kurangnya 50% daripada keseluruhan peruntukan Perbelanjaan Pembangunan Asas Persekutuan. Namun begitu, terdapat beberapa projek yang diluluskan oleh Kerajaan Persekutuan tidak mengambil kira cadangan dan hasrat Kerajaan Negeri khususnya di Perlis untuk mempelbagaikan fungsi sesuatu projek sedangkan Kerajaan Negeri mempunyai dasar serta hala tuju yang telah mengambil kira pelbagai keperluan dan kehendak semasa serta pada masa hadapan. Misalnya, Projek Lencongan Banjir Barat Timah Tasoh yang telah dilaksanakan pada tahun 2015, di mana dalam pembinaan terowong banjir terdapat skop pembinaan pada item pencahayaan di dalam terowong berjumlah RM300 ribu. Namun, skop berkenaan telah dikeluarkan atas alasan penjimatan. JPS Perlis selaku pelaksana projek telah membangkitkan perkara ini supaya dikekalkan atas faktor keselamatan dan memudahkan kerja pemantauan serta penyelenggaraan di dalam terowong di masa hadapan. Akan tetapi, ianya masih tetap dikeluarkan daripada skop asal projek."

**[ Menteri Ekonomi ]**

## 20. PR-1523-U(27)298

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa Kerajaan supaya mengkaji dan merancang satu inisiatif khas bagi memastikan setiap rakyat dan keluarga Malaysia terutamanya dari golongan B40 dan M40 mampu memiliki kediaman pertama dengan menyediakan rumah mampu milik berharga RM200,000 dan ke bawah baik di luar dan di dalam bandar. Kerajaan tidak boleh hanya memperkenalkan inisiatif yang hanya sekadar '*rebranding*' daripada Kerajaan sebelum ini kerana perubahan yang besar perlu dilakukan bagi mendepani kenaikan kos pembinaan disebabkan kenaikan harga barang binaan. Dasar Perumahan Negara (2018-2025) sendiri memperakui bahawa isu kemampuan memiliki rumah semakin ketara di kalangan rakyat dan impak kenaikan harga rumah yang mendadak turut dirasai golongan M40 selain B40. Inisiatif khas untuk menyediakan kemudahan rumah pertama pada harga di bawah RM200,000 dan ke bawah ini hendaklah dijadikan salah satu sasaran kajian semula Dasar Perumahan

Negara dan memerlukan input dari pelbagai Agensi dan Kementerian serta pihak bukan Kerajaan dan bukan dari satu Kementerian sahaja. Isu kemampuan memiliki rumah pertama jika tidak ditangani akan mewujudkan generasi rakyat yang sentiasa menyewa tanpa mendapat peluang memiliki perumahan sendiri. Golongan generasi ini juga akan terus menjadi mangsa kepada harga hartanah yang melambung akibat spekulasi hartanah dan tanpa kawalan harga sehingga menjadikan harga di luar kemampuan sebenar golongan M40 dan B40."

**[ Perdana Menteri ]**

21. PR-1523-U(27)299

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa Kerajaan melaksanakan segera projek-projek tebatan banjir di seluruh negara untuk memastikan projek ini dilaksanakan secara holistik dan dapat mencari jalan penyelesaian kepada isu banjir yang semakin meruncing akibat kesan perubahan iklim dan pembangunan yang tidak mesra alam. Antara projek yang perlu dilaksanakan segera adalah seperti Projek Pembangunan Sungai Bersepadu (PLSB) Sungai Golok (KESBAN) dan Sungai Kelantan. Dengan pembinaan projek tersebut, risiko banjir besar dapat dikurangkan. Di samping itu, projek tebatan banjir di Selangor khususnya di Shah Alam dan bandar Kuala Lumpur juga diharapkan dapat dilaksanakan dengan komprehensif agar dapat menangani masalah banjir kilat."

**[ Menteri Sumber Asli, Alam Sekitar dan Perubahan Iklim ]**

22. PR-1523-U(27)300

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa supaya Kerajaan melaksanakan satu perancangan persediaan dan pengurusan risiko bagi menghadapi bencana alam dapat disemak semula akibat impak perubahan iklim yang sangat drastik sejak kebelakangan ini. Hal ini demikian kerana perancangan rapi penting bagi memastikan tahap kesiapsiagaan anggota terlibat berada di tahap yang tinggi. Di samping itu, Kerajaan juga perlu merencana satu langkah holistik bagi mendidik masyarakat agar bersiaga siaga untuk menghadapi bencana alam kerana kesedaran terhadap isu ini di dalam kalangan masyarakat masih berada di tahap yang rendah berdasarkan peristiwa bencana alam yang lepas."

**[ Perdana Menteri ]**

## 23. PR-1523-U(27)301

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa Kerajaan supaya membentuk satu pasukan petugas khas bagi memberi perhatian terhadap isu pencerobohan sempadan yang berlaku di Sabah dan Sarawak. Seperti di ketahui, Sabah dan Sarawak pula berkongsi sempadan darat sejauh 2,019.5km dengan Kalimantan, Indonesia. Daratan Negara Brunei Darussalam dibatasi sepenuhnya oleh Sarawak sepanjang 481.3km. Kebanyakan kawasan perbatasan Malaysia bersama negara-negara jirannya terletak di kawasan perbukitan yang diliputi hutan tebal dan kawasan perairan laut menyebabkan kawalan terhadap kawasan-kawasan ini sulit dilakukan. Oleh sebab itu, masalah pencerobohan, penyeludupan, pemerdagangan manusia dan perdagangan narkotik adalah antara isu yang saban tahun masih berlaku dan sukar ditumpaskan. Dengan siapnya Lebuhraya Sematan – Telok Melano juga baru-baru ini secara tidaklangsungnya meningkatkan risiko pencerobohan sempadan sama ada melalui darat dan laut terutamanya melalui Taman Negara Tanjong Datu. Oleh hal yang demikian, tindakan segera Kerajaan bagi mencari solusi terbaik kepada masalah kawalan sempadan ini adalah amat diharapkan."

**[ Menteri Dalam Negeri ]**

## 24. PR-1523-U(27)302

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa Kerajaan supaya melaksanakan tindakan kawalan yang lebih ketat berkenaan jualan arak. Garis panduan yang khusus perlu dikaji dan diwujudkan oleh Kerajaan bagi mengawal penjualan arak yang meliputi waktu dan tempat jualan arak yang seragam dan boleh diguna pakai di seluruh negara bagi tujuan mengelakkan masalah sosial yang sering timbul seperti masalah rumah tangga dan kemalangan jalan raya. Oleh yang demikian, keseragaman tindakan daripada Kementerian Kewangan dan Pihak Berkuasa Tempatan (PBT) adalah amat diperlukan sekiranya ingin melaksanakan tindakan kawalan yang lebih ketat terhadap jualan arak kerana ketika ini ketidakseragaman tindakan antara dua entiti ini menjadi antara punca kawalan jualan arak tidak dapat dilaksanakan secara efektif dan efisien."

**[ Menteri Kewangan ]**

25. PR-1523-U(27)303

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa Kerajaan bersikap adil dalam mengamalkan kebebasan media di Malaysia. Kerajaan tidak seharusnya menjadikan Suruhanjaya Komunikasi Multimedia Malaysia (SKMM) sebagai alat politik untuk menyekat mana-mana isi kandungan media yang tidak '*pro*' Kerajaan atau tidak sependapat dengan Kerajaan. YAB Perdana Menteri yang memerintah Kerajaan pada masa ini telah berikrar dalam manifestonya untuk memastikan hak kebebasan bersuara dan melindungi kebebasan media. Namun, keadaan sebaliknya berlaku selepas beberapa bulan beliau membentuk Kerajaan. Lebih mendukacitakan, kebebasan media yang diwar-warkan Kerajaan hanyalah terhad kepada '*pro*' Kerajaan sahaja, manakala parti pembangkang secara halus dikenakan sekatan kepada akses media. Mana-mana media rasmi Kerajaan mahupun swasta tidak diberi kebenaran untuk menyiarkan berita mengenai parti pembangkang mahupun pihak yang menentang Kerajaan. Oleh demikian, Kerajaan digesa supaya berlaku adil dalam menyalurkan maklumat kepada rakyat. Tindakan ini adalah penting untuk memastikan hak kebebasan media tidak dicabul sewenang-wenangnya oleh pihak-pihak tertentu."

**[ Menteri Komunikasi dan Digital ]**

26. PR-1523-U(27)304

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa Kerajaan supaya menyediakan perancangan, peruntukan dan prasarana kepada pelajar-pelajar universiti, kolej, STPM dan SPM bagi menghadapi kaedah pembelajaran alaf baru seperti pembelajaran dalam talian dan menggunakan media elektronik. Ini bagi membolehkan dan mendedahkan mereka ke alam teknologi siber dan e-pembelajaran yang semakin berkembang yang seterusnya memerlukan guru-guru yang terlatih dalam pendidikan alaf baru."

**[ Menteri Pendidikan ]**

27. PR-1523-U(27)305

**Dato' Seri Dr. Shahidan bin Kasim [ Arau ]** akan mencadangkan :

"Bahawa Dewan Rakyat ini menggesa Kerajaan mengkaji semula kawasan keluar dan masuk sempadan Malaysia-Thailand di Wang Kelian, Perlis. Sebelum ini, penduduk kedua-dua negara boleh menikmati kemudahan bergerak sehingga dua kilometer tanpa menggunakan pasport atau pas sempadan pada hari minggu. Kuatkuasa itu pernah dibuat bermula tahun 1993 hingga 2015. Akan tetapi, penarikan semula kemudahan kebebasan bergerak ini telah dibuat pada tahun 2015 kerana penemuan rangka manusia mangsa sindiket pemerdagangan manusia yang dipercayai etnik Rohingya. Susulan itu, Wang Kelian menjadi pekan mati hingga kini. Kerajaan Negeri Perlis cuba membangunkan semula kawasan pelancongan di Wang Kelian, namun ianya tidak semeriah dahulu. Justeru itu, Kerajaan diharapkan dapat mengkaji dan mempertimbangkan semula untuk memberi kemudahan bergerak di antara kedua-dua negara seperti sebelum ini. Dengan kemudahan tersebut, ianya akan dapat menjana semula perkembangan ekonomi khususnya buat penduduk tempatan yang sebelum ini amat rancak sebelum ditutup sepenuhnya pada tahun 2015. Semasa adanya '*Free Flow*' ini, Wang Kelian merupakan satu destinasi pelancongan yang amat meriah dan telah memberi ruang kepada peniaga-peniaga kecil di Perlis dan juga Selatan Thailand menambahkan pendapatan mereka."

**[ Menteri Dalam Negeri ]**

**\*\*UCAPAN-UCAPAN  
( PERATURAN MESYUARAT 17 )  
( KAMAR KHAS )**

| <b>Tarikh Ucapan</b>    | <b>Ahli Yang Berucap</b>                       | <b>Tajuk Ucapan</b>                                                                         | <b>Menteri Yang Bertanggungjawab</b> |
|-------------------------|------------------------------------------------|---------------------------------------------------------------------------------------------|--------------------------------------|
| 1. 18.10.2023<br>(Rabu) | 1. YB Dato' Mohd Isam bin Mohd Isa (Tampin)    | 1. Cadangan Menaik Taraf Jalan Tampin-Gemas FT001                                           | 1. YB Menteri Kerja Raya             |
| 2. 18.10.2023<br>(Rabu) | 2. YB Dato' Mohd Isam bin Mohd Isa (Tampin)    | 2. Keperluan Pemasangan Lampu Jalan dalam Kawasan Tanah Rancangan FELDA dan Sekitarnya      | 2. YB Menteri Kerja Raya             |
| 3. 18.10.2023<br>(Rabu) | 3. YB Tuan Haji Kamal bin Ashaari (Kuala Krau) | 3. Simpang Tiga yang Gelap Gelita Menjadi Asbab kepada Kemalangan Jalan Raya                | 3. YB Menteri Kerja Raya             |
| 4. 18.10.2023<br>(Rabu) | 4. YB Tuan Haji Kamal bin Ashaari (Kuala Krau) | 4. Isu Tanah Mendap Yang Merosakkan Jalan Persekutuan di Jambatan Kuala Krau (Sungai Kerau) | 4. YB Menteri Kerja Raya             |

**\*\* Ucapan Di Bawah Usul Berkenaan Perkara Tadbir Kerajaan (Peraturan Mesyuarat 17)**